

प्रादेशिक समाचार

- देश रा 244 वर्गीकृत नागरिक सुरक्षा जिला मांय काल मॉकड्रिल करी जावेला-राजधानी जयपुर समेत प्रदेश रा 28 शहरां मांय ई अभ्यास कर्यो जावेला।
- राज्य मांय माइनिंग योजनावां ने ऑनलाइन तरीका मंजूरी देवण रो काम सारू व्हयो-करीब 30 हजार लाइसेंसधारकां ने फायदो मिलेला।
- राज्य रा घणखर हलका मांय आंधी-बारिश ऊं गर्मी ऊं साता मिली।
- खेलो इंडिया यूथ गेम्स मांय राजस्थान री हर्षिता जाखड़ साइक्लिंग होड़ मांय सोना रा तमगो जीत्यो।

000

देशभर रा 244 वर्गीकृत नागरिक सुरक्षा जिला मांय काल गांवां रा लेवल ताई मॉकड्रिल करी जावेला। पहलगाम आतंकी हमला पाछे देश री हिफाजती व्यवस्था मजबूत बणावण सारू गृह मंत्रालय मोटा पैमाना माथे नागरिक सुरक्षा मॉकड्रिल करण रो फैसलो कीनो है। आ ड्रिल देशभर मांय एके सागे करी जावेला जिण रो मकसद किण ई संभावित आतंकी हमला रा हालात रो सामो करण सारू जनता ने तैयार करणो है। केन्द्रीय गृह सचिव गोविन्द मोहन इण री तैयारियां रो जायजो लेवण सारू राज्यां अर केन्द्र रा राज वाळा प्रदेशां रा मुख्य सचिवां सागे वीडियो कॉन्फ्रेंस रे जरिये मीटिंग कीनी। मीटिंग मांय नागरिक सुरक्षा महानिदेशक, एनडीआरएफ रा महानिदेशक अर दूजा आला अहलकार शामिल व्ह्या। प्रदेश मांय ई राजधानी जयपुर समेत 28 शहरां मांय आ ड्रिल करी जावेला। ई सारू सायरन लगायी ज्या है अर दूजी तैयारियां करी ज्यी है। मुख्य सचिव सुधांशु पंत आला अहलकारां सागे मीटिंग कर र तैयारियां रो जायजो लीनो। म्हाणा चित्तौड़गढ़ खबरनवीस बतायो के मॉकड्रिल रा तहत सिटी कंट्रोल रूम ऊं हूटर बजायो जावेला अर बिजली बंद राखी जावेला।

000

मुख्यमंत्री भजनलाल शर्मा गुजरात रा केवडिया मांय चाल रह्या भाजपा रा सांसदां अर विधायकां रा सिखावण शिविर मांय सिरकत कीनी। तीन दिन रा ई शिविर रा दूजा दिन आज न्यारा-न्यारा सत्रां मांय पार्टी रा आला ओहदादार सियासत री बारीकियां री चर्चा कीनी। श्री शर्मा काल 'स्टैच्यू ऑफ यूनिटी' जा र लौहपुरुष सरदार वल्लभभाई पटेल ने सिरधाभाव सागे याद कीना। ई दौरान केन्द्रीय मंत्री भूपेन्द्र यादव ई वां सागे हा।

000

राज्यपाल हरिभाऊ बागडे आज कोटपूतली-बहरोड़ मांय अहलकारां सागे मीटिंग कर र जिला मांय चलाया जा रह्या विकास रा कामां रो जायजो लीनो। श्री बागडे नुवी शिक्षा नीति, मनरेगा रा तैत कराया जा रह्या विकास रा कामां, सूरज री रोशनी ऊं बिजली बणावण री मशीनां लगावण अर मृदा स्वास्थ्य कार्ड समेत केई मुद्दां माथे विगतवार चर्चा कीनी। राज्यपाल कह्यो के विकसित भारत री सोच सांची करण सारू शिक्षा रो प्रसार जरूरी है।

000

आईआईटी जोधपुर रा शोध करण वाळा पीवण रो सुरक्षित पाणी मुहैया करावण सारू कम खर्च री मशीन बणायी है। म्हाणा खबरनवीस बतायो के आ मशीन कूड़ा, बावडिया अर तळावां समेत दूजा स्त्रोतां रा पाणी मांय आर्सेनिक री मौजूदगी री मौके ई ठा कर सके है। पाणी मांय आर्सेनिक घुळ्यो व्हेवण रे कारण केई बीमारियां व्हे है। ऐड़ा हालात मांय आ मशीन स्वास्थ्य ऊं जुड़्या खतरा कम करण री दिशा मांय खास कदम है।

000

राज्य मांय माइनिंग योजनावां ने ऑनलाइन तरीका ऊं मंजूरी देवण रो काम सुरू व्हे ग्यो है। खान विभाग रा प्रमुख सचिव टी. रविकान्त आ जाणकारी दीनी। वे बतायो के जयपुर, ब्यावर, सिरौही, बारां, बांसवाड़ा अर चूरू मांय लाइम स्टोन बर्निंग, मेसेनरी स्टोन, ग्रेनाइट, लाइमस्टोन क्रशर अर क्वार्ट्ज फेल्सपार रा माइनिंग प्लान अर योजनावां मंजूरी सारू पेश करी ज्यी है। श्री रविकान्त बतायो के नुवी व्यवस्था ऊं करीब 30 हजार अप्रधान खनिज लीजधारकां अर क्वारी लाइसेंसधारकां ने फायदो मिलेला।

000

ब्यावर जिला रा केसरपुरा मांय गैर कानूनी तौर ऊं खनन करण वाळां रे खिलाफ कार्यवाही करी ज्यी। खनिज विभाग, राजस्व विभाग अर पुलिस री ओर ऊं करी ज्यी ई कार्रवाई रे दौरान मौका ऊं फेल्सपार रो गैर-कानूनी खनन री ठा पड़ी। जिला कलेक्टर महेन्द्र खड़गावत बतायो के वठे ऊं निकाळी ज्यी ई खनिज ने दिसावर मांय बेची ज्यो, जिण रो मोल 2 करोड़ 27 लाख रुपया मान्यी ज्यो है। पुलिस मामलो दर्ज कर र खातेदारी निरस्त करण री कार्यवाही सुरू कर दीनी है।

000

प्रदेश मांय लारला तीन-चार दिन ऊं चाल रह्या आंधी-बारिश रा दौर रे कारण पारो उत्तरण ऊं गर्मी ऊं साता मिली है। घणखर ठौड़ां दिन अर रात री बगत तापमान सामान्य ऊं 5 ऊं 8 डिग्री सेल्सियस नीचे चाल रह्यो है। मौसम रा जाणकारां रे मुजब मई महीना रा पहला पखवाड़ा मांय राज्य रा घणखर हलका मांय घणी गर्मी नी पड़ेला। आज जैसलमेर, बाड़मेर, जोधपुर, नागौर, बूंदी, अलवर अर श्रीगंगानगर समेत केई जिलां मांय जोरदार बायरो बाजण अर आंधी सागे कठे-कठे हल्की बारिश व्हेवण रा समाचार है। बालोतरा मांय कुछ देर तांई जोरदार मेह बरस्यो। जिला रा पाटोदी, कल्याणपुर अर पचपदरा मांय ई चोखी बरसात व्ही। म्हाणा श्रीगंगानगर खबरनवीस बतायो के जिला रा पदमपुर अर रायसिंह नगर मांय तेज बिरखा व्ही।

डीग मांय हल्की बिरखा व्ही। प्रदेश रा केई जिलां मांय बादळा मण्ड्या रह्या। ई बीचे उदयपुर मांय काल रात आया अंधड़ अर तेज बारिश ऊं शहर मांय केई ठौड़ां बिजली रा खम्भा पड़ ग्या अर रुंखड़ा उखड़ ग्या। मौसम केंद्र जयपुर आवता एक सप्ताह तांई आंधी-बारिश रो दौर चालतो रेहवण रा आसार जताया है। केंद्र रा निदेशक राधेश्याम शर्मा बतायो के जोधपुर, कोटा अर उदयपुर संभाग मांय आज अर काल तेज आंधी चालण अर बिरखा सागे बीजळी पड़बा री शंका है।

000

राज्य मांय लू-तापघात रा हालात ने ध्यान राखता थकां ग्रीष्मकालीन सघन निरीक्षण अभियान चलायो जावेला। ई रे मार्फत दवाइयां री लगातार अर जरूरी तादाद मांय पूर्ति मांय ईलाज ऊं जुड़्या साज-ओ-सामान री क्रियाशीलता री निगराणी राख्यी जावेला। राजस्थान मेडिकल सर्विसेज कॉरपोरेशन री ओर ऊं ई अभियान सारू 27 टीमां बणायी ज्यी है। कॉरपोरेशन री प्रबंध निदेशक नेहा गिरि बतायो के अ टीमां जिलां मांय करी जा रही जरूरी तैयारियां रा बारा मांय 30 मई तांई रपट देवेला।

000

खेलो इंडिया यूथ गेम्स 2025 साइकिलिंग होड़ मांय राजस्थान री हर्षिता जाखड़ सोना रो तमगो जीत्यो है। होड़ रा तीजा दिन आज नई दिल्ली रा इंदिरा गांधी स्टेडियम मांय लड़कियां री आ होड़ सुरू व्ही। इण री साढे सात किलोमीटर स्क्रैच रेस मांय हर्षिता आ उपलब्धि हासिल कीनी। आकाशवाणी सागे बातचीत करता थकां हर्षिता कह्यो के जोरदार टक्कर री ई होड़ मांय हर खिलाड़ी बेहतरीन खेल रो दरसाव कीनो।

लड़कां री 10 किलोमीटर स्क्रैच रेस मांय राजस्थान रा महावीर सरन चांदी रो तमगो जीत्यो।

000

प्रदेश मांय गरीबी मुक्त गांव बणावण माथे खास ध्यान दियो जा रह्यो है। मुख्यमंत्री भजनलाल शर्मा ई सारू बजट मांय प्रावधान करी है अर ई नवाचार रा पैला दौर मांय पांच हजार गांवां रो लक्ष्य राख्यी ज्यो है।

गरीबी मुक्त गांव योजना रा तैत पिछाणी ज्या गांवां रा गरीबी री लकीर ऊं नीचे जिन्दगी बसर कर रह्या सगळा पिरवारां ने गरीबी री लकीर ऊं ऊंचा उठावण सारू तीन सौ करोड़ रुपया रो प्रावधान करी ज्यो है। ग्रामीण विकास मंत्रालय प्रधानमंत्री आवास योजना—ग्रामीण मांय राजस्थान ने 2 लाख 73 हजार 752 घरां रो लक्ष्य दीनो है। इण ऊं साल 2018 री आवास प्लस सर्वे री लिस्ट मांय अब कोई ई परिवार ई री इन्तज़ार मांय नी रेहवेला। ग्रामीण विकास विभाग ज़िला कलेक्टरां ने कागद लिख र सगळा पात्र पिरवारां ने मदद री पहली किश्त जारी करण रा हुकम दीना है।

ध्यानजोग है के देश रा गांवांई हलका मांय सभी के लिए आवास मकसद सागे पीएमएवाई—जी चलायी जा रही है। मकान बणावण सारू एक लाख 20 हजार रुपया री मदद दी जा रही है।